



08-05-2023

UPA23/62

Innuttaasunut, aalisartut, piniartut savaatilillu inuussutissarsiorlutik ingerlatsinerminni silap allanngorneranut attuumassutilimmik ajunaarnersuarmut assingusumik eqqugaasut aningaasatigut ikiorserneqarnissaat siunertaralugu Naalakkersuisut Aningaasanut Inatsimmi Kontomik pilersitsinerup peqatigisaanik kattuffiit attuumassuteqartut suliamut akuliutsinnerisigut ikiorsiisarnermik aaqqissuussinermut periusissanik aalajangersaanissamik Naalakkersuisut suliaqassapput, tamanna kontomi pingaarnermi oqaasertaliinikkut imaluunniit namminerisamik inatsisissatut siunnersuuteqarnikkut pissaaq.

(Inatsisartuni ilaasortaq Agathe Fontain Inuit Ataqtigiit)

Siunnersuuteqartoq Agathe Fontain Inuit ataqtigiit siunnersuutaanut soqutiginantumut Siumumiik qujassuteqarfigaarput, imatullu oqaaseqaateqassaagut:

Siullertut erseqqissaatigerusupparput ukiut kingulliit siunnersuuteqartup qulequttatut qaqitaa, siammasissumik Siumup iluani annertuumik oqaluuserineqartarmat, ilaatigullu qaqinneqarnissaa pillugu siunnerfimmik piusoqarluni. Taamaakkaluortoq nuannaarluta siunnersuut tunngaviatigut taperserusupparput tunngavilersuutillu makku erseqqissaatigerusullugit;

Silap allanngoriartornera piffimmi atukkatsinni piusoq unammilligassanik annertuumik pilersitsivoq, tassami siusinnerusukkat silamik naatsorsuisinnaaneq atugaalluarsimasoq, massakkut atornissaa nalorninarsisimavoq, tassa qanoq ukiussamut tulluuttumut siunnerfiliisinnaaneq eqqarsaatigalugu. Ataaserli nalunangilaq tassalu silap allanngornera piusoq naatsorsoruminaatsorujussuamik nalaataqarfiortiterpoq, taamatullu unerisimanginnerup kinguneri annertuumik unammilligassanik pilersitsiffiupput, ajoraluartumillu siammasissumik inuutissarsiutit qulaani pineqartut pillugit eqqorneqaatsit annertuut nalaanneqartalerput, taamatullu nalaataqarnermi periarfissaasinnaasut killeqartutut taaneqarsinnaallutik.

Ilisimavarput silap allanngornerata kingorna, silap unerisimangiffii allaat piffissami sivisuumi atuuttalersimasut, tamakkulu pingaartumik piniartut eqqarsaatigalugit ukiup naajartornerani ajoraluartumik annertuumik ilaqutariinnut amerlasuunut inuutissarsiutit uninngatitaasarnerani aningaasaqarnikkut nalaassinerluttartut, allanillu periarfissaasinnaasunik amerlanertigut piusoqartangimmat allatut ajornartumik tamanna ikiorserneqarnissamik noqqaanermik kinguneqartarlutik.

Taamatut nalaataqartarneq ajoraluartumik ilaqutariippassuarnut kinguneqarnerluttarpoq pingaartumik aamma meerartallit ilaqutariit eqqarsaatigalugit, taamaattumik pitsaanerpaamik ikorfartuisinnaaneq annertuumik Siumumiit pingaartipparput, taamaattumillu periarfissanik allanik ujartuisoqarnissaanut peqataarusulluinnarnerput oqaatigissallugu.

Silap naatsorsoruminaalluinnarnera allanngorneralu aammattaaq savaatilinnut eqquinerliorsinnaanera eqqumaffigineqartariaqartoq tunngaviatigut paasilluarparput, tassami inuutissarsiut taanna aammattaaq silap eqquisinnaanera eqqarsaatigalugu innarlerneqarnissamut qanittumiittutut taarusukkatsigu, taamatullu suliniarnermi aammattaaq ilanngullugu siunertamut ilaalluni peqataatinneqarnissaa tamakkiisumik taperserlutigu.



Siunnersuut kontomik pilersitsinissamik taamatut nalaataqartunut atugassiisusaaq tunngaviatigut tamakkiisumik taperseparput, neriutigalugu suliaq piaartumik ingerlasinnaanngussasoq. Taamatullu siunnersuuteqartup taasaa, tassalu Kattuffiit susassaqtut suliniummut peqataatinneqarnissaat tunngaviatigut taperseparput, taamaasilluni ilisimasat pisariaqartinneqartut aalajangiisartoqassappat pigineqalissammata, tassami suliniut nutaaq qanorpiaq iluseqarluni qinnuteqartunut assigiinngitsunut suleriuseqassanersoq pinngitsoorani qulaajaavineqartariaqassamat, ilanngulluguttaaq kissaatigivarput qulequttami pineqartut aningaasaateqarfissamut (Kontomut) piginneqataassasut kissaatigatsigu, tamanna qanorpiaq iluseqassanersoq Kattuffiit susassaqtut peqatigalugit aaqiivigineqassasoq kaammattuutigalutigu.

Ilanngulluguttaaq piffissaq manna iluatsillugu ukiarmi ajornartoortoqarnerani iliuuseqarsimasooq tassalu Thule Fondi iliuuserisimasaanut pitsaasumut tunngatillugu nersuulaarusukkatsigu, piffimmini nammineq iliuuseqarnera maligassiinertut pitsaasutut taarusupparput.

Ukiortaami oqalungiaammi ilanngullugu taaneqarput qanga ileqqutoqarput tassalu pilisarneq, pilisarneq qangaaniilli atugaasimavoq ullunut ajornernut nerisassaqaarnikkut sillimmatissatut, taamaammat tamatumap periutsip inuiaqatigiit ataannarnissaanut tunngavileeqataalluinnarsimasup pisariaqassusaa matumani oqallinnermi ilanngullugu taarusupparput kisaatitut eqqarsaatissiissutitut apuullugu.

Pingaarnertulli ersarissumik qulequttami nalorninaatsumik pineqartut tassaassapput Kontomik pilersitsinermi suliaqarfigineqartussat taakkuuppullu inuutissarsiummik annertuumik ajornartoornermi salliutinneqarlutik inissimasussat, tassa taariikkatsitut allamik saaffissaqanngilluinnarnermi aammalu ikiorsiinissamut tunngavissat piutinnagit kontomit pilersinneqartussamik tapiiffigineqartussaassasut, taamaasiornikkut atukkatigut ikorfartuisinnaaneq piuppat tamanna pineqartunut pitsaasumik kinguneqassasoq Siumumiit upperilluinnarparput.

Taamatut oqaaseqarluta siunnersuut ataatsimiititaliamut susassaqtumut ingerlateqqipparput sukumiisumik suliarineqarnissaa inassuteqaatigalugu, tassanilu suleqataalluarnissarput naqissuserlutigu.

Jens Kristian Therkelsen, Siumut